

Balad Ti-Rajou

Enn papyon zonn lor enn fey ver

Pe kas poz dan soley liver.

Ti-Rajou tourn vit so ledò.

Ayo so lespri lor tablo!

- Kot to pe ale mo bayo?

Kifer to prese do matlo?

- Mo pe al lekol pou aprann abesede,
Mo pe al lekol pou mo vinn enn gran misie.

Pa tro loin enn serin safran

Pe souffle so refrin fringan.

Ti-Rajou ferm vit so zorey.

Ayo so lespri pa parey!

- Kot to pe ale mo bayo?

Kifer to prese do matlo?

- Mo pe al lekol pou aprann anglefranse,
Mo pe al lekol pou mo vinn enn gran misie.

Boukie banane rouz anfler,
So fler pe parfim liniver.
Ti-Rajou bes vit so lizie.
Ayo so lespri finn vinn vie!

- Kot to pe ale mo bayo?

Kifer to prese do matlo?

- Lefrayt-lefrayt mo bizen konn mo tab par ker,
Defoidekat, sinon mo pou pey sa bien ser.